

四庫全書

集部

欽定四庫全書

集部

明詩綜卷二十四

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷二十四

翰林院檢討朱彝尊編

馬愉一首

愉字性和臨朐人宣德丁未賜進士第一仕至
禮部右侍郎兼侍講學士有澹軒集

題高漫士雲山圖

白雲縹緲亂山深最喜幽居傍翠岑茅屋幾家松栝繞

石梯五丈薜蘿侵門前流水通南浦邨外長橋接北林
有客抱琴何處至祇知來共歲寒心

蕭

鎡 二首

鎡字孟勤泰和人宣德丁未進士累官太子少

師戶部尚書兼翰林院學士有尚約集

靜志居詩話蕭鵬舉學詩於劉槎翁當日宋景
濂烏繼善劉仲脩文稱之宮師鵬舉之子家法

不
隆

樂隱為尹克俊賦

行愛溪中水坐愛溪上山富貴非所願蓬門晝常闕
清風天外來入我窗牖間豈無一尊酒可以銷憂顏
葉落驚秋徂鳥啼知春還既忘是與非寧復慮險艱
雅志同如此高蹤安可攀

題九鷺圖

宣德年間邊景昭彩色翎毛稱獨步近時林良用水墨
落筆往往皆天趣鴛鴦鳬鴈清溪流寒鴉古木長林幽
閒來得意即揮灑一掃萬里江南秋此圖九鷺真奇絕

散立清煙乍明滅日長坐久看轉親飄來點點青天雪
翱翔霄漢殊不驚欲下未下渾有情潛蹤獨趁水邊食
延頸忽向蘆中鳴吁嗟林生精藝有如此座客見之誰
不喜洞庭湘渚在眼前暝色慘澹涼飈起方今聖主覃
恩波四海山澤無虞羅悠悠羣鷺各自適雖有鷹鷂奈
爾何

林文一首

文字恒簡莆田人宣德庚戌賜進士第三累官

太常寺少卿兼翰林院學士贈禮部右侍郎謚

襄敏有澹軒集

謝山子云公詩多韻外之致與綢齋相去不遠

秋景

水已澄秋色峰看淡落暉鴈投寒渚下漁逐暮潮歸
寺初鳴磬孤城半掩扉行人從喚渡舟子去如飛

方熙 一首

熙字孟明莆田人宣德庚戌進士改庶吉士出

為潮州府通判

金匱要略卷之二十一
古別離

愁心不自聊
撫我孤桐琴
絲桐感人意
絃急無好音
拂衣起歎息
逍遙獨行吟
遠望別離處
江空煙水深

徐有貞 二首

有貞初名理字元玉吳縣人宣德癸丑進士選
庶吉士授編修歷春坊諭德擢僉都御史天順
初用奪門功拜華蓋殿大學士兵部尚書封武
功伯未幾下獄戍金齒尋赦還卒有武功集

詩話武功羽林
之作源山右丞

羽林子 二首

珠袍年少子名冠羽林中獨佩流星劍雙懸明月弓陪
游向何處還入華清宮

羽箭插腰間駢弓臂上彎自從來日馭長得侍天顏借
問歸何晚長楊射獵還

李賢 一首

賢字原德鄧州人宣德癸丑進士授吏部主事

歷郎中擢兵部右侍郎改戶部旋改吏部進尚
書入直文淵閣終少保兼太子太保華蓋殿大
學士卒贈太師謚文達有古穰正續集

詩話內閣紅芍藥一本宣宗移自南大內植焉
代宗增植二本左純白右深紅七年未花裕陵
復辟徐武功有貞許襄敏彬薛文清瑄李文達
賢同時入為學士中一本恰開四花其一久而
不落既而三人皆去惟文達獨留明年春萌芽
左二右三中一本甚多而彭文憲時呂文懿原
林襄敏文劉文安定之倪文僖謙錢文通溥李
侍郎紹黃謙學諫同升學士凡八人文達因約
花時共賞夏四月開八花是日講學不至明日
復開一花僉謂講學當之文達乃主賞花會賦

詩者四十人哀成一集蓋自宣德八年本院有
文淵閣賞雪詩未有若是會之盛者至正德中
大學士梁儲楊一清猶有詩倡和嘉靖初長洲
陸粲為庶吉士賦詩云此花初種自宣皇百曲
雕闌七寶妝玉堂學士看花早賦成芸閣
留詩草度其時遺種尚存其後不可問矣

城上烏

城上烏啼月將落城外秋風起寥廓烏聲啼罷露華晞
曙色蒼涼照長薄都門車馬集如雲離筵勸酒何殷勤
酒闌人去權歌發明日烏啼何處聞

吳高一首

高字尚志歸善人宣德癸丑進士除刑部主事
歷員外郎遷福建參政

黃洞山

惠陽十萬家采薪皆此處荷葉蓋頭歸知是前山雨

姜洪一首

洪字啓洪樂安人宣德癸丑進士改庶吉士歷
修撰有松岡集

題畫

碧山高樹雨初晴風動懸蘿雜鳥聲簾幕晝垂茅屋靜
幽人何處斲黃精

王

誼 六首

誼字內敬紹興山陰人宣德初待詔翰林預修
國史以子佑貴封工部右侍郎

詩話內敬兄弟皆能遠
師太白一時之希聲也

古意

獻玉無良媒漂淪寡歡豫壯齡已非昔馳暉日西驚嘉

木無榮柯修條亦成故一感式微吟吁嗟在中路

關山別意

蓮葉未青時沙頭話別離舟行期早發日晏未曾移遲
迴一何久念我平生友莫問去程遙且盡杯中酒君今
住何處萬里長城路路遠人迹稀黃雲黯朝暮隴阪歷
欵傾雙輪不暫停時聞鳴咽水流作斷腸聲驅車無少
息又度長蘆北八月鴈南飛天山草俱白橫笛在高樓
關山月裏愁離人聽此曲白盡少年頭

魏楚白云學供
奉長干詞得其

似形

九日稽山懷古

山水自如昨古人今復誰雲煙謝家墅松栢禹陵祠聖
代身全老秋天景易悲母將搖落意相對菊花枝

班婕妤

玉簫夜涼新秋蛾暗裏顰如何天上月獨照掌中人

宗子

相云幽
思無限

春思

山映簾櫳水映窗
浣紗人在芡蘿江
年年三月梨花雨
門掩東風燕子雙

畫梅

揚州詩閣掩芳塵
萬萼千葩冷照春
十里珠簾一聲笛
東風腸斷倚樓人

王懌 三首

懌字內悅紹興山陰人
誼之弟正統初官溧水

知縣

江南意

郎居橫江口妾住橫江上生小慣風波蓮舟喜搖蕩蕩
舟蓮花灣花紅照人顏舉頭見郎來低頭隱花間花疎
不成隱相見還相哂都緣愁思深留連夕陽盡前浦伴
將稀那能不相違含情明月下各自擢歌歸

班婕妤

自失傾城寵花顏落舊紅霜飛金屋冷月照錦帷空侍
寢昭陽日休辭玉輦同當知長信妾團扇泣秋風

周青士云

似劉
方平

段七孃

度曲千金賤凝妝一面紅
聲迷銅雀妓豔奪館娃僮
白雪飄朱閣香塵散綺櫳
淚滿司馬袖腸斷使君驄
秋水涵瞳潤春山入黛濃
弄簫驚紫鳳拂軫怨離鴻
鏡展金鸞月釵橫玉燕風
謝孃收鈿匣羸女掩香筒
石竹蓼芳髻芙蓉隱繡幃
燈然珠樹側人醉錦蓮中
粲粲星輝戶微微露洗空
幾年憐宋玉今夕遇韓馮
密意蜂攢蕊芳

心蝶戀春牋封豆蔻羅帶綰芎藭步障重拋錦門鋪
疊綴銅曲闌裝翡翠高榭噪花蟲鶯睡煙濛柳烏棲月
浸桐銀觥休鑿落瓊箭起丁東客散歌屏冷香昏睡閣
融日高春夢覺嬌纈散花綰

陵麗京云全首非金荃亦
非香奩頗似李長吉愜公

之作

劉經一首

經泰和人宣德中新鄭儒學訓導

鳳皇臺

崇臺有水濱昔有鳳皇集朝陽不復鳴荒基徒屹立漠漠飛塵紅萋萋豐草碧鳳兮去不回使我空歎息

周旋一首

旋字中規永嘉人正統丙辰賜進士第一授翰林修撰進侍講兼左春坊左庶子有畏菴集

霜林晚節圖

朔風何蕭蕭嚴霜亦浩浩維此歲載陰羣芳盡枯槁懿彼松栢心堅貞長自保春風桃李花春雨蘼蕪草紛紛

競顏色第逞一時好

劉定之一首

定之字主靜永新人正統丙辰賜進士第三人
成化初以太常少卿兼侍讀學士直內閣進侍

郎卒謚文安有杲齋集

李賓之云劉文安不喜為詩縱其學力往往有

出語奇崛用事精當者安公石云杲齋以淵博之學英敏之才發為文章名蓋一時獨於韻語若未解者然

義山

家居禾川滑義山日對面悵未得登臨此心徒健羨今
春雪中來半塗足已倦顧視萬坡陀茫然莫可辨巖蘿
冒飛雲林葉響急霰俛若赴井汲仰疑登塔旋奇觀豈
神助寒苦亦吾願日暮抵山麓小溪亂石濺僕夫指龍
湫時或出雷電信宿留山間陰晴已千變仁里固有鄰
誅茅從所便嗟我四方人安得長眷戀

沈 淳 一首

淳字惟厚嘉興人正統丙辰進士官吏部員外

郎有拙菴集

閒居

天上抽簪萬里迴
秋風黃菊滿籬開
翟公不復為廷尉
姑負賓朋日往來

劉珏 三首

珏字廷美長洲人
正統戊午舉人除刑部主事

歷官山西按察僉事有完菴集

王濟之云完菴詩能以眼前語

道胸中事
有唐人風

朱仙鎮岳王祠

鄜北師還事已休，憑誰重報靖康讐。
洛中故國非周土，江左新亭半楚囚。
和議自遺千載辱，蠟書空送兩宮愁。
傷心多少英雄淚，付與漳河日夜流。

泊舟垂虹橋

貫酒烹鱸敵暮寒，垂虹橋上倚闌干。
行人笑指詩翁嬾，不到城中訪縣官。

梅

歲寒相見在天涯
玉色珠光帶露華
笑殺玄都狂道士
種桃何不種梅花

戴

璉

一首

璉南海人正統戊午舉人官訓導以子縉貴贈

工部尚書

送梁瑾赴春闈

江亭日落鷓鴣啼
酒盡沙頭惜解攜
離思不堪成去住
官情無那易東西
清秋野戍聞寒角
殘月山城聽曉雞

明日思君還北望暮雲煙樹晚悽悽

張和 三首

和字節之崑山人正統己未進士授南京刑部

主事進員外郎陞浙江提學副使有篠菴集

顧玄

言云節之寓目
成韻風采蘊籍

送劉文羽入京

臨岐一杯酒為君歌遠游人生如浮萍聚散焉能謀落
日照大江長風吹行舟江花與江水離恨同悠悠

過桐君山

霧斷山疑合，川迴路忽分。
秋聲兩岸葉，曉色萬峰雲。
旅鴈衝帆度，寒蟬隔水聞。
嚴陵遺跡在，我欲問桐君。

送龔進士文彥

雪後關河見鴈稀，感時傷別思依依。
吳門煙月期同醉，天路雲山又獨歸。
官驛暮帆隨雨落，江城寒鳥背人飛。
京華此去誰先達，惆悵丘園只布衣。

祝顯一首

顥字惟清長洲人正統己未進士授南京刑科
給事中陞山西左參議轉右參政

夜宿無錫

辭家無百里離思已紛紛旅泊今宵始鄉音此地分汀
沙籠宿霧星月挂疎雲回首寒山寺鍾聲杳不聞

成始終 一首

始終字敬之無錫人正統己未進士河南道御
史出為湖廣按察僉事有蓬菴觀光紀行等集

山家

竹籬茅屋似儂家
細路緣江盡白沙
落日叩門山客至
鷓鴣啼上石楠花

倪謙一首

謙字克讓錢塘人徙上元正統己未賜進士第
三人累官南京禮部尚書贈太子少保謚文僖
有玉堂南宮上谷歸田等橐

題白鹿仙人圖

百尺松陰石磴重千年白鹿澗邊逢仙人月底吹簫去
知向緱山第幾峯

呂原 十首

原字逢原秀水人正統壬戌賜進士第二除翰林編修歷右春坊大學士轉通政司右參議仍入為翰林院學士以母喪歸卒贈禮部右侍郎

謚文懿有介菴集

李原德云公端謹篤實士也詩有典則音律渾厚無纖巧

靡麗之態

詩話大懿不以詩名所為古風引伸曲喻不求工而自然精切此有德者之言也

古風 十首

天運無停機造物有消息雪見睨曰消日逢中乃昃飄
風固須臾暴雨亦頃刻溝潦寧常盈江河無久溢枯楊
華暫生朽壤茵虛植繁英易憔悴病葉早狼籍浮雲能
幾時初月豈終夕細推皆自然達觀又奚感慨彼聲利
徒擾擾竟何益

泰終否斯受賁盡剥乃續日中漸西移月盈竟東朒平

久鮮無陂往久靡不復樂極悲自來進銳退恒速安弗
持則危滿不損乃覆高位多疾顛厚味每藏毒至盛當
遭哀苦寒必生燠萬事無不然禍福相倚伏

通犀為角戕文豹緣皮剝蚌懷珠致剖麝含香被搏翠
因羽美殘龜以甲靈灼鸚鵡慧入籠鵬鵠鷺受縛鐸以
聲自毀膏以明自爍的張弓矢中林茂斧斤斫直木取
易摧甘井汲先涸忠直志常蹇聰明命多薄行高毀或
來事修謗或作取禍因天才君子當自度

薰猶不同藏冰炭不同器杓鑿每齟齬蘭艾常嫌忌燕
禽肯戀吳越馬匪思冀水投石難入矛遇盾弗利道異
不相謀事殊不相為學古而居今落落與時背

陰陽匪齊盛日月弗並明五行難俱旺四時豈同更一
淵不兩蛟一池無二鯨鷺鳥少雙集猛獸稀羣行秦暴
楚乃弱吳強越乃爭鄰薄君必厚都大國始傾左長右
斯短首重尾即輕兩雄肯俱立兩貴弗相能讒進衆賢
退正消羣枉升四凶如不去元凱何由登保身在明哲

吾嗟古人情

木從繩則正薪受斧乃析輕重平以衡長短度於尺規
矩制方員繩墨司曲直浣布須賴灰攻玉必資石金就
礪方利火被水斯熄凡物有相制用之在人識

湛露晞於陽冰雪消以日咻出衆楚人齊傳窘無術蕪
彼滿車薪杯水救奚恤一君子獨愛百小人羣嫉不敵
有如斯勢力固難必

泮林集飛鶚食甚懷好音惡人謹齋沐承祀亦居歆瓦

石變和玉鉛鐵成南金化惡以為美君子當存心

愛敬舍吾親德禮悖所事少者或陵長賤者或妨貴骨
肉情已疎而篤朋友義妄媵欺令妻螟蛉剿同氣闖茸
列尊顯聖賢皆退避讒諛志得伸方正多遺棄盜跖稱
守廉伯夷號貪利不肖謂為賢不才謂為智用人積薪
然居高乃後至足上首顧下冠屨易其位曲鉤榮侯封
直絃斃路次黃老先六經大道俱埽地狼莠正繁滋芳
蘭亦憔悴本末既舛逆事理斯倒置君子安其常勿為

時軒輊

懷人寘頃筐卷耳采不盈爵祿靡入心飯牛有肥牲左
規右執矩方負豈竝成目明非兩視耳聰非兩聽心專
使二用智者亦鮮能

姚夔 一首

夔字大章桐廬人正統壬戌進士累官禮部尚
書調吏部加太子少保卒贈少保謚文敏有藹
藹堆橐

詩話文敏久領容臺修明禮樂其於先賢祀典
聞必舉行因錢長沙澍之請而建祠賈誼之井
因章布政繪之疏而樹碑比干之祠因商學士
輅之章追封董仲舒等伯爵因左吏部贊之奏
而修護李泰伯之瑩他若為金華四先生及劉
因立祠皆有裨名教自公沒而程敏政建議於
前張孚敬順之於後舉凡戴聖劉向鄭衆賈逵
何休馬融服虔鄭玄廬植王肅王弼杜預范甯
等一十三人從祀孔子之廡者皆罷之真天資
刻薄人所為也文敏過忠州弔陸宣公墓賦詩
云一讀遺文數行淚拜瞻松栢不勝悲因而訪
李吉甫白居易胡旦諸公皆謫此地問有祠否
土人為言故有今廢乃檢行囊廩米一石倡之
屬州守廣文修舉作詩以勉其成焉可以媿程
張諸老也已

下峽

瞿塘天下險，巫峽勢相連。
夾岸千尋壁，中流一罅天。
山空無獸迹，江逼少人煙。
唯聽夔夔鼓，朝牽百丈船。

韓 雍一首

雍字永熙，吳縣人。正統壬戌進士，累官總督兩廣軍務、右都御史。卒，贈襄毅，有集。

江行懷天全侗軒諸老

西江北塞嶺，南壩奔走風塵三十年。
勇退未能心已倦。

專征纔歇夢猶懸自緣衰體纏多病敢向明時話獨賢
苦憶鄉園諸大老西風先泛五湖船

項忠 二首

忠字蓋臣嘉興人正統壬戌進士授刑部主事
歷員外郎中陞廣東按察副使改山東遷陝西
按察使陞右副都御史進左都御史刑部尚書
改兵部卒贈太子太保謚襄毅有藏史居集

詩話襄毅以功業顯詩文罕傳其里居日結稿
李耆英之會月一集於僧房道院中同會者雲

南布政司參議金禮敬之四川按察司僉事梅
江文淵福建按察司僉事戴祐元吉漳州知府
姜諒用真武岡知州伍方公矩碭山知縣包萬
汝和通判楊彥和教授陳蒙福主之者公也會
始於弘治戊午春所賦詩文文淵彙為一集府
學教授新淦蕭子鵬序之比於香山洛社云

出清遠峽野望

行盡溪中路蒼茫見遠天歸猿啼

一作平林開

曉日飛鳥入

寒煙綠樹江頭驛黃茅郭外田孤懷無限思望斷白雲
邊

題宋徽宗画碧桃鸚鵡

五國城邊掩淚時
汴梁宮闕已無遺
爭如鸛鵒知春色
獨占東風第一枝

商輅一首

輅字弘載淳安人
正統乙丑賜進士
第一累官少保兼
太子少保吏部尚
書謹身殿大學士
贈

太傅謚文毅有素菴集

李德恢云太傅詩寫性情雍容雅澹有陶韋風

題春景山水

愛此佳山水
春來景更妍
四郊青嶂合
孤岫白雲連
地

迴輪蹄絕峰危石磴懸小橋臨曲澗達浦接平田鬱鬱
林間寺潺潺竹下泉桑麻凝暮藹榆柳繞晴川寶殿凌
千尺茅堂敞數椽僧歸西嶺月漁釣北溪煙倒浸沈波
塔閒橫古渡船樓高平見日松老不知年鳥度浮嵐外
鷗飛落照邊吟筇芳草徑酒旆杏花天隔岸聞鶯語開
軒待鶴旋砌苔深染黛林籟細鳴絃有路通仙境無塵
遠市廛家山在圖畫觸目思飄然

葉盛
四首

盛字與中崑山人正統乙丑進士授兵科給事中出為山西右參政累官吏部左侍郎卒謚文莊有涇東橐

詩話文莊中外數歷不遑寧居而見一異書雖殘編蠹簡必依格繕寫儲藏之目為卷止二萬餘然奇祕者多亞於冊府二百年來子姓蕃衍瓜分豆剖難以復聚今披萊竹堂書目譬諸商盤泗鼎要非近代物惜不可得而覩矣詩特餘事選家恒置不錄近其裔孫始重鐫刻行之然有德必有言後之學者所當諷誦也

題畫

綠樹青山漾碧流
畫中風景似揚州
隔江明滅漁人火
出岸高低估客舟
去燕來鴻千古事
閒花野草一春愁
不知誰在紅塵外
獨向蕃釐觀裏游

重送徐汝陽

繡衣驄馬珊瑚鞭
看君文采何翩翩
河梁話別未三月
天府論功今六年
近郭好山碧於玉
邊淮遠樹青堆煙
歸塗有懷須寄我
莫惜便鴻雲錦箋

和尚原

和尚原頭日未西肩輿來此重攀躋可憐宋主功垂就
不道金人計已迷往事已隨深谷變青山還與白雲齊
道傍草樹淒風起疑是將軍鐵馬嘶

曲子驛

戎衣脫却下蕭關坐對環泉半日閒未是老來筋力倦
馬蹄歸自賀蘭山

史敏一首

敏字德敏淮安衛人

一云定海人

正統乙丑進士歷

官河南右參政

岳武穆祠

鄂國英風萬古存當時一死不堪論
難將片石補天缺空恨浮雲蔽日昏
南渡自安新割據中原誰復舊乾坤
至今人過朱仙廟便對斜陽拭淚痕

劉昌 二首

昌字欽謨吳縣人正統乙丑進士授南京工部
主事歷員外轉工部郎中出為河南提學副使

遷廣東參政有胥臺鳳臺金臺嵩臺越臺諸臺

詩話欽謨無題五首不脫元人舊染而世顧稱之昔晉人之譏劉輿也謂輿猶膩近則汙人若

欽謨及瞿宗吉楊君謙張君玉之艷詩其不汙人也僅矣

春眺

端居秉高志道與黃綺謀耿耿千歲懷安能一朝酬青
陽肇嘉節義馭逝不留樹木發華滋綠葉揚芳柔上有
鳴春鳥嚶嚶求匹儔踟躕不能寐攬衣起行遊況復有
良朋分若金石投攜手出西郭眷言山水幽祓除激清

波眺彼陟高丘西北臨廣路巍巍列飛樓誰人為燕會
交親結綢繆光景忽西馳娛樂殊未休豈不念合并欲
邁路阻修顧望勿復道回身駕輕舟折彼蕙蘭花聊以
忘我憂

繆天自云是篇
特能絕去肥膩

八月三日直內閣楊少保延話率口呈此

翠玉樓臺映碧虛上皇曾此駐鑾輿當時侍

一作官

從皆

能事只說相如有諫書

卞榮

三首

榮字華伯江陰人正統乙丑進士官戶部郎中

有蘭堂集

丘念先云蘭堂集詩幾二千篇獨無五言古而五言近體亦少蓋非其所

長云

林良雙鴈圖為王學士廷貴兄廷彥賦

林君善畫天下無海注墨汁傾金壺金門承詔屢揮灑
餘子碌碌非吾徒既不畫丹鳳棲碧梧又不畫文鴛依
綠蒲特作槐堂雙鴈圖涼風颯颯吹黃蘆一鴈俯啄秋
江菰一鴈翹首如相呼乘軒恥隨衛懿鶴化鳥嬾逐王

喬臯吾知林君有深意此圖將以比兄弟槐堂兄弟今
二難同德同心本同氣芳名豈但動一時勝事終當傳
百世丹青我已重林君手足誰能似王氏宣王有道美
鴻鴈周公多才賦常棣顧予淺薄敢題詩三月紫荊花
底醉

寄隱者

曾訪巖棲處金鵝石榻前歌君紫芝曲和我白雲篇火
宿燒丹竈煙生種玉田林泉無限好三聘未幡然

歸來吟

日落春申港雲歸巫子門沙洲半江水楊柳數家邨

陳獻章

二十八首

獻章字公甫新會人正統丁卯舉人用薦授翰

林檢討卒謚文恭從祀孔廟有白沙集

李賓之云白沙

詩極有聲韻有風致但世人未之擇耳

林待

用云先生詩涵養粹完脫落清灑獨超造物牢

籠之外而寓言寄興於風煙水月之間蓋有舞

雲陋巷之風焉楊用修云白沙詩五言冲淡

有靖節遺意然賞識者少徒見其七言近體效

簡齋康節之渣滓至於筋斗樣子打乖簡裏如

禪家呵佛罵祖之語殆是傳燈錄偈子非詩也
王元美云公甫詩不入法文不入體又不入
題而其妙處有超出法與體及題之外者 俞
汝成云白沙詩從擊壤中來當另作一家看要
之藝林不
可無者

詩話成化間白沙詩與定山齊稱號陳莊體然
白沙雖宗擊壤源出柴桑其言曰論詩當論性
情論性情先論風韻無風韻則無詩矣故所作
猶未墮惡道非定山比也其云百鍊不如莊定
山蓋謙
辭爾

贈陳秉常

遠色霽初景清風振遙林子來入我室弄我花間琴正

聲一何長幽思亦已深願留一千載贈子瑤池音

藤蓑

新蓑藤葉青舊蓑藤葉白新故理則然胡為浪忻戚扁
舟西浦口坐望南山石東風吹新蓑浩蕩滄溟黑須臾
月東上萬里天一碧安得同心人婆娑共今夕

拉馬玄真看山

宮府治簿書倥偬多苦辛文士弄筆硯著述勞心神而
我獨無事隱几忘昏晨南山轉蒼翠可望亦可親歲暮

如勿往枉是最閒人近來飲酒者惟我與子真能移柳
間舫同泛江門津

紫菊吟寄林時嘉

嚴霜百卉枯三徑挺秋菊綠葉明紫英微風遞寒馥懷
哉種花人杳在江一曲遺我盎中金南窗伴幽獨時無
續騷手憔悴誰當錄且脫頭上巾茅柴今可漉

秋興

西風振庭木虛堂夜蕭蕭攬衣步明月歸鴈雙飄飄天

地豈予獨知音不可招冥心祈有合悵望空雲霄

有懷世卿

時雨日夕來郊原藹新綠白雲被重崖下映寒塘曲情
結竹上言魂銷井邊躅三年隔瀟湘書至不可讀

題新村書齋壁

茅棟依巖靜柴門斫竹通桑榆巷南北煙火埭西東一
逕漁樵入孤村井臼同鄰家得美酒吹笛月明中

晚步

水國秋先至江村晚更幽
泥筌收郭索山網落輜輶涼
入社門樹陰連渡口舟獨憐
經略地吾得放歌遊

龍谿寄馬元真

我家久住龍谿上說著龍溪便有情
荔子不將梨關美沙螺羞與蠃爭衡
江村婦女蕉衫窄市巷兒郎木屐輕
漫與詩多誰和我樽前忙殺馬先生

重約馬默齋外海看山

春風擬進赤泥洲曾約看山共此遊
落蕊忽過三月半

先生能復一來不堪老我癡猶在且喜嬌兒病已瘳
想得渡頭楊柳樹清陰間弄釣魚舟

種樹

早雨山泥滑屐牙瘦藤扶路入雲斜東原綠映西原白
一徑松連兩徑花寒夜試看殘月挂東風須著短牆遮
江門亦是東門地我獨胡為不種瓜

訪客舟中

船頭載春酒船尾閣春沙恰到溪窮處山山枳殼花

九日

霜前淡淡花瓢內深深酒今日陶淵明廬山作重九

贈張叔亨侍御

天下原無事勞勞我有心相攜沙上語山月二更深

贈釣伴

短短萋萋淺淺灣夕陽倒影對南山大船鼓枻唱歌去
小艇得魚吹笛還

歇馬大徑山

數家煙火隔林塘一樹寒花晚自香
黃葉冢頭聊歇馬鷓鴣聲裏近斜陽

東軒獨坐

桃花寂寞梨花開山中薄酒三五杯
村西有客可人意風雨今朝期不來

社中

社屋新成燕子來山丹未落野棠開
三三兩兩兒童戲弄水扳花日幾回

梅花

沙籠寒月樹籠煙香徹龍溪水底天斜隔竹林窺未得
更尋西路上漁船

桃花

雲鎖千峯午未開桃花流水更天台劉郎莫記歸時路
只許劉郎一度來

柳渡頭荅鄉友

溪南溪北荔支垂五月荷花乍放時忽有酒船邀半路

三杯不記主人誰

大田看山

春泥沒屐大田潮溪北
初經獨木橋千丈峰頭望東海
三山恰對杖頭瓢

留姜仁夫

雲去雲來等是浮
獨凭高閣看江流
南風莫送東歸客
更共江門一日游

彈子磯候默齋不至

軍人打鼓泊官船黑霧濛濛水下灘隔岸相呼不相見
竹籠牽火上桅竿

南雄讀羅一峰記書院文

丘墳何處草離離千里湖西夢覺時落日小池橋上路
催人下馬讀殘碑

鄒吏目書至有作

落花遙對石城春半篋殘書一病身茶筴粟餅供客盡
不妨人笑長官貧

落花

落花半落流水香
鳴鳩互鳴春日長
美人別我隔江浦
欲來不來空斷腸

古耶道中有懷

翠煙浮隴麥初齊
社樹青青獨鳥啼
何處相思不相見
木棉花下水門西

方謨一首

謨字昌言歸安人
正統丁卯舉人由翰林院孔

目擢檢討

遊春

黃鳥嚶嚶啼水東柳絲千尺繫春風清溪小舫載歌舞
滿郭好花紛白紅有酒莫辭今日醉何人却是百年翁
請看十畝王孫宅芳草淒迷夕照中

岳正一首

正字季方潮縣人正統戊辰賜進士第三天順
初以左贊善兼修撰直文淵閣降欽州同知謫

成肅州成化初復官未幾出為興化知府卒謚

文肅有類博橐

李賓之云蒙泉詩亦雅健脫俗

詩話季方謂作詩既要平仄又要對偶安得許多工夫頗以吟詠為苦而天眷之作亦復成章

營建紀成詩

自序天眷美營建也

天眷皇明誕命高祖俯建萬方定都江潯如龍斯蟠如
虎斯踞以朝以會以享以祀邈矣厥謨欽于世世一天
眷皇明亦啓文祖為厥孫謀聿又胥宇碣石之西太行
之東有嚴厥宮四海是同二維帝即祚夙夜顧諟神既

受職民亦綏止乃繼乃述乃經乃營戢此土工為萬國
宗^三有赫朝堂有翼廟廷瑣瑣公府總總偕興士方耕
矣女方箴矣曾是不驚奏功成矣^四匪臣之功伊民之
力匪民之力維帝之則帝曰匪予文祖之德天相文祖
爛其營室^五

劉 珣 一首

珣字叔溫壽光人正統戊辰進士累官太子太
保戶部尚書兼謹身殿大學士卒贈太保謚文

和有古直先生集

徐時用云公書法飄逸行草尤長詩文清新流麗無矯飾

語李賓之云公於詩興之所到筆不能闕而無毫髮點綴呻吟之病

詩話文和詩率意塗寫不事翦裁亦間有合格處其送龍溪潘榮宗用詩云同年喜有九尚書九尚書者眉州萬文康安循吉歷城尹恭簡吳同仁博野劉文穆吉祐之華亭張莊懿瑩尚文三原王端毅恕宗貫甫田陳康懿俊士英其二則潘與劉皆正統十三年同榜也宗用仕為南戶部尚書八人皆有易名之典惟潘闕焉

白頭鳥

殘蓼枯荷八月秋枝閒獨立更遲留憐渠本是無情物

何事而今也白頭

汪回顯 一首

回顯字汝光祁門人正統戊辰進士除戶部主事出知惠州府

聞猿

使蜀三年未得歸青山樓閣倚斜暉猿聲久聽渾閒事
却笑巴人淚滿衣

鄭文康 一首

文康字時又崑山人正統戊辰進士不仕有平

橋集

詩話平橋集文勝於詩嘗從徐立齋閣老借舍
經堂所藏本讀之愛其簡質有類石守道尹師
魯諸公詩
亦蘊藉

寄海上韓杲

行盡清谿到水涯好山環繞故人家寥寥一犬柴門外
只隔橋東幾樹花

倪敬一首

敬字汝敬無錫人正統戊辰進士官監察御史

有月樓集

題畫

溪雲靄靄樹團團溪上幽亭六月寒日暮看山人已去

水禽飛上石闌干

詩話宋毛珣吾竹題蕪子美滄浪亭詩云日暮
客歸園館閉鷺鷥飛上石碁盤侍御題畫作頗
與相類然知非蹈襲不妨竝垂也

夏寅一首

寅字正夫松江華亭人正統戊辰進士除南京

吏部主事歷郎中陞江西提學副使參政浙江

遷山東右布政使有史詠紀行集

李賓之云東南士大夫每

不喜夏詩謂有頭巾氣也王元美云夏正夫如鄉里老人衣錦見達官非不嚴麗但寒鄙可厭

詩話正夫名亞欽謨方劉似勝

宋家後葉如東晉南渡虔州更可哀母后撤簾行在所
相臣開府濟時才虎頭城向江心起龍脈泉從地下來

人代興亡今又古春風回首鬱孤臺

周

鼎

六首

鼎字伯器嘉善人正統中官沭陽典史有桐村

疑舫齋土苴集

都元敬云先生以大名浙西土苴集二卷詩不止是然不期驚

人而人自驚不期去陳言而陳言自無不去米人惟山谷老人不隨人後說者稱其能出新意若先生詩可傳已陸秀卿云先生雖文士而學務實用如議水利鑿鑿不迂故金榮襄公薦之謂可居館閣乃卒不遇姑託文以自見依隱玩世多鏗鏘幼眇之音其志亦可悲矣俞右

吉云伯器文勝於詩

詩話桐村開濟之略戎幕宣顧一尉白頭又
遭菴改之謗哀哉斯人實命不淑同時杜州牧
庠貽詩云功名已覺卽鄆夢衰老猶耕谷口田
汪縣令貴詩云白首九旬還向學黃梁一夢總
成虛呂太常憲詩云斯文籍籍歸輿論何物區
區戀抱闕沈處士周詩云山縣軍書前吏迹墓
堂文字老生涯吳江史處士鑑詩云行誼故絕
人文章復名世碑版照南州煌煌自無替集中
詩題有未死作云在塗嗟未歸行橐日已貧正
如風中絮未肯沒車塵嘲鴈云何地不虞網此
身非故鄉誦之使人心惻詩不見佳第恥
拾人遺唾亦有志之士明古實師事之

勸農

二月二日天作雨縣官府官齊出城白頭父老花間迎

亦有牧兒先馬行牛亦不避馬不驚饁者自饁耕者耕
東村西村鼓笛聲願得守令枉柴荆田家年來解留客
新婦炊杭姑磨麥

送黃給事使滿刺國封王

遠國來王日深恩冊拜時璽書中禁出天語使臣知路
指諸蕃近山行四牡遲故人青瑣夢無限五雲思

江行

萬里雲濤上孤帆一羽輕霜清天宇闊沙白海潮平山

寺欲浮動鄰舟偶合并瓊花尚無恙回首廣陵城

湯陰旌忠廟

墓木南枝說武林北來祠宇又湯陰
鵲啼故國春何在馬躍中原日已深
未死姦諛誰請劍至今忠義尚霑襟
千秋此地歸英魄風雨靈旗儼若臨

林和靖先生墓

一丘千古獨巋然只少梅花抱墓田
結就巢居猶昨日塑來鶴立自何年
淡煙流水斜陽外芳草新亭古岸邊

欲去徘徊城月上裏湖猶有未歸船

冬夜

寶篆沈煙白銀屏燄燭紅不知窗外雪撩亂撥春蟲

王清一首

清字一寧合肥人世襲濟寧衛指揮陞廣東都
指揮死於寇難有建紫集

塞上感懷

西風關外雪初晴懷古思鄉百感生玉帳枕戈人萬里

鐵衣傳箭夜三更夢回絕域烏桓地戰罷空山敕勒營
烽火微茫天路遠月中鴻雁起秋聲

郭登

十二首

登字元登武定侯英諸孫景泰初官都督僉事

守大同以功封定襄伯英廟復辟謫戍甘肅成

化初復爵卒贈侯謚忠武有聯珠集

李賓之云
國朝武臣

能詩者莫

過郭定襄

詩話定襄力捍牧圍功存社稷聯珠一集繼父
兄掉鞅詩壇西涯以為明初武臣之冠即其山

王楸樹諸篇力已排冢至詠泉之作直兼張王
韓杜之長豈惟武臣一時臺閣諸公孰出其右
錫山俞汝成乃謂可式後之
為勲衛者是替者之言也

題蔣廷暉小景

我家南山中柴門別經久不知今春來新添幾株柳清
江閒釣竹鷗鷺還來否對此忽相思長歌獨搔首

自公安至雲南辰沅道中謁山王祠

山王廟在山深處烏鴉亂啼烏桕樹神威猙獰怖殺人
朱吻長牙眉倒豎紅綃抹頭袍袖結手按黃蛇啗其舌

短碑不題神姓名
蕪詞漫書唐歲月
陰風颯颯吹靈旗
夜聞甲馬空中嘶
老巫開門馬無跡
但見狐鳴鬼嘯鵒
鵒啼山前居民種
禾黍歲歲求晴復
求雨神靈不靈誰
得知老巫分明作
神語往來行人多
再拜爐中無香畏
神怪唱歌打鼓燒
紙錢蒼鵒白羊朝
暮賽還把殘餘拋
野草神喜歡欣鳥
亦飽老巫丁寧客
無慮萬水千山放
心去

楸子樹

井序

去歲于蒙太監家移栽此樹當就結實繁衍今
年春令已深草木皆萌蘖而獨此枯瘁略無生
意土俗相傳以為栽樹當歲著花特餘氣耳來
歲則否必三年而後如故予甚信之偶數日伏
枕不出今晨就庭事啓窗則花已爛熳比他樹
尤盛見者咸以為異予亦歡然以喜因賦長句
并識意云

窗前新栽楸子樹去歲移自東君家根深土凍重莫致

輓以兩犍載一車方經旬日即蓓蕾秋深結子如丹砂
人言此特餘氣耳來歲未必能芬葩我初聞之稍驚怪
重以土俗相傳誇今年春風已撩亂千株萬卉皆萌芽
南山青翠遠可見獨有此樹猶枯朽我徵前言苦不樂
行憐坐惜恒咨嗟連朝病困閉門卧夢寐猶憶花如何
今晨勿藥彊起坐眊焉兩瞳如隔紗推窗一見笑絕倒
蔥蔥滿樹開成霞冰綃素錦誰翦刻小紅輕翠相交加
日光照耀春欲醉翩翩蜂蝶爭紛拏賓朋來觀繞百匝

共疑造化理則那花枝爛熳色更好
詖辭輕易可信邪
豈非陽春有深意憐我老憊來天涯
浮生過半身計拙
有足不及蛇憐蛇故教相伴慰岑寂
豈敢與物爭豪奢
六年羈鰥入僧定但未落髮披袈裟
青裙小鬟別來久
淚眼垢膩首不珈已聞桂蠹化胡蝶
忍聽鸚鵡呼琵琶
花雖可愛不忍折無人插向兩髻丫
鈎簾靜坐獨清賞
天明起看到日斜知音未遇寡
懽趣有酒不飲惟烹茶
前年官司催入貢六千里路豈不遐
移根天苑比瓊樹

有用未必過桑麻物生遭遇即珍貴便應壓盡諸般花
我慙不如花命好謫官五載辭金華住迴邊城氣蕭索
旦暮憾憾聞蘆笳自憐淺薄不足忌羣兒何以喙競呀
方圓鑿枘苦難入冠非薦角強觸邪古人明哲有深戒
省愆痛欲掩戶搗窮荒雖覺雙眼淨聒耳厭聽公私蛙
再歌南風終不競天驕吹脣魯婦髻羌兒雜還近邊鄙
意態詭異聲踴譁陰霾接旬不成澤嗟嗟恒欲噬我殽
麒麟獅子遠將至爾曹慎勿相邀遮駟騎東來蹠山倒

黃口學語聲啞啞羣公羅拜但垂手踐踏不啻蟲與鰕
人逃馬死金滿篋一擲何足挂齒牙我雖無位百憂集
終夜感歎心如瘥廿年蹤跡半天下把鏡自照兩鬢髣
老懷食蔗如食蠟豈但無味仍饒渣行路難行古如此
道多豺狼水鱷魴紛紛兒女競聲利左蠻右觸方爭蝸
金雞何日解羈去一竿歸釣吳江槎箕山潁水跡長往
漁蓑樵擔肩相摩閒看得意鼠如虎怕說病聰蟻間摩
黃雞紫蟹且慰意背癢正得麻姑爬羞將口腹累州里

未能不食如匏瓜猶勝夷齊待薇蕨園收芋栗兼粳植
老農追隨種禾黍偶耕林下時燒畬心淳語直意真率
肝膽相照無疵瑕瑤臺璇室豈不好嘽嚙較此猶爭些
囊中黃金尚餘幾壺乾酒盡還當賒頽然一醉玉山倒
世間萬事皆由他

梟

南山萬古雪六月地上冰崢嶸況當嚴冬氣尤冽萬物
僵立不識死與生陽烏戢其羽顏色慘澹無光晶朝朝

畏寒不敢出欲挽海水添長更氈裘蒙茸縮如蝟風沙
斷盡行人行老鳥平時最饒舌攢毛縮頸飢無聲鴟鴞
獨何形無乃金鐵鑄使成白日在何處每到夜黑來飛
鳴有時呼嘯聲愈厲名號怪鬼徵邪精鳳皇凍欲死志
意無由平梟凶不可治怒癭空膨脝南村孀婦貧且苦
夫死未葬兒東征伏雌五雛初解殼畏寒就暖聲唧唧
土房穿漏窗戶破梟竟突入雞啼驚雛死腦盡裂雌倂
不能爭孀時睡艷艷欲起視夜無油燈乞鄰把火照昏

黑梟止未去勢欲相欺陵口吻尚流血兩目光瞋矐矐
髮豎股慄返走撲地魂飛騰有夫攘臂挾弓矢弗斬此
梟何以懲入門無所見但聞狐鳴鬼嘯寒氣颯颯如凝
冰矐悲呼天涕垂膺卯此惡物當誰憎戟手詬社公媿
汝威稜稜雖云土木偶想亦歛名稱人皆祀汝作土主
安然坐視反不如梟能社公顏忸怩渥若朝霞蒸據案
呼吏兵卑官亦靈承廟食于此方乃被婦詬吾奚勝便
須封皐囊騎雲款天庭叩階瀝血天其矜不以梟磔死

吾道何由宏
天門九重高
且遽守以夜
又威鼎闢
趨蹌肅鳴佩
以手奉局心
顛悸大閤倚
棖方假寐
瞠目視之訶
且詈汝官何
曹直蟲臂清
都森嚴可輕
易社公前致
辭大閤已知
意鼎鑪尚有
耳投鼠須忌
器梟為天驕
子美惡各以
類羽中豈無
靈與瑞不及
梟姿工嫉媚
乘昏伺暗察
幽隱附耳連
睂方倚比汝
不知忌諱胡
不膠脣結舌
亦足以自異
彼喙若呀非
汝利社公頓
首前此言得
無愆天道本
至公如何有
憎憐苟不較
曲直何

由辨媿妍以彼醜惡形乃竊造化權常聞上古時宰物
無頗偏禍淫與福善今豈不其然地行蒼生何啻千萬
億煩冤疾痛孰不號旻天渾沌苟未鑿何用呼吸百里
晝夜東西旋大閤笑絕倒以掌拍其肩小儒強解事未
悟磨兜堅汝胡不聞天地同一物不過一十二萬九千
六百年氣機消長豈常好清淳澆濁各各隨時遷天人
不同道此理可忘言語既復歎悔丁寧極密勿妄宣社
公涕漣如瀕首但長吁載拜謝不敏攬轡回其車錫鑾

風泠泠墜地不須臾亟往告彼孀夜降桑林巫梟雖不
勝誅誰敢訐其辜朋儕相搆煽勢與天為徒母腦尚忍
啄何有于朱朱素餐抱深媿予亦思乘桴嗟爾門單戶
弱形羈孤從今慎勿與梟敵但須夜夜牢護雞巢雛

西屯女

西屯女兒年十八六幅紅裙脚不韞面上脂鉛隨手抹
百合山丹滿頭插見客含羞嬌不語走入柴門掩門處
隔牆却問官何來阿爺便歸官且住解鞍繫馬堂前樹

我向厨中泡茶去

保定塗中偶成

白壁何從摘舊瑕
纔開羅網向天涯
寒窗兒女燈前淚
客路風霜夢裏家
豈有酖人羊叔子
可憐憂國賈長沙
獨醒空和騷人詠
滿耳斜陽噪晚鴉

甘州即事

黑河如帶向西來
河上邊城自漢開
山近四時常見雪
地寒終歲不聞雷
牦牛互市番氓出
宛馬臨關漢使回

東望玉京將萬里雲霄何處是蓬萊

客中春晚

遠塞書難寄空庭花自開舊巢雙燕子今歲不曾來

春日遊山偶成

林下扶藤杖溪邊整葛巾春風莫相妒不是折花人

口號寄涇州守李宏

渡了黃河又黑河春風秋月五年過涇陽太守如相問
更比來時白髮多

客中相見倍相親
白酒黃雞莫笑貧
君住淮南我淮北
如何不是故鄉人

甘州

甘州城西黑水流
甘州城北黃雲愁
玉關人老貂裘敝

苦憶平生馬少游

集本題作送岳季方還京前云登高樓望明月明月秋來幾圓缺多情只

照綺羅筵莫照天涯遠行客天涯行客離鄉久見月思鄉搔白首年年長自送行人折盡邊城路傍柳東望秦川一鴈飛可憐同住不同歸身留塞北空彈鋏夢繞江南未拂衣君歸復喜登臺閣風裁袂袂尚如昨但今四海歌昇平我在甘州貧亦樂下文云云

明詩綜卷二十四

欽定四庫全書

明詩綜卷二十五

翰林院檢討朱彝尊編

楊翥

二首

翥字仲舉吳縣人少與兄成武昌為鄉校師仁
宗驛召授翰林編修歷修撰遷邨府長史景泰
初擢禮部左侍郎尋進尚書有晞顏先生集

陳闕

闕云先生詩若太羹玄酒不
待薑桂鹽梅而至味自存

黃岡阻雪

積雨既淫濫飛雪何漫漫經旬苦不止行子多悲酸
酸亦何事匪為饑與寒倚門累晨暮定省違承顏欲行
阻泥塗欲濟愁驚湍凍木號江介飢鳥噪林端向風長
太息恨不生羽翰出門不自遂誠哉行路難

秋懷

肅肅涼吹發唧唧寒蛩吟春夏不自豫況乃秋氣臨時
序忽流邁感此百憂尋人生誠須臾華髮易為侵立名

亦素志為善實所欽塵事日紛擾進修力不任愁懷難
自遣徙倚高梧陰

靜志居詩話晞顏集借之琴川毛氏有人為施
鉛評云宜亟焚毀勿暴其短於後世可也未免
太過楊公長者當存其言
以予所錄二首亦自成章

范澄一首

澄字國清寶應人景泰庚午舉人

送別

酒盡津鼓喧風生浦帆亂山迴不見君夕陽在沙岸

柯潛一首

潛字孟時莆田人景泰辛未賜進士第一授翰林修撰歷右春坊右中允洗馬遷尚寶少卿陞詹事府少詹事兼翰林學士有竹巖集

詩話漢有金馬石渠蘭臺東觀宋有總明陳有德教周則虎門麟趾北齊則仁壽文林唐則麗正集仙開元中始定為翰林院其署與他公廡不同中有徘徊精舍四面步廊畫壁花塼假山叢竹侈金鑒之密記建學士之新樓汴宋玉堂尤加藻飾泊乎南渡雖屬偏安而省舍一新濯纓之泉滌硯之澗芸香之亭汗青之軒以及蓬壺松坡蘭畦芝館藥洞菊徑橘洲鶴砌儲圖史

翰墨於中故論者以詞臣為神仙之職也明初
舊院有修竹林學士黃宗豫寄東里詩云一別
詞垣數月餘娟娟修竹近何如北京既建院設
玉河橋西堂後有井劉文安所鑿也亭二間凡
八楹柯學士所築也井在左亭在右至今入翰
苑者以劉井柯亭為佳話而堂後柏二株亦學
士所植李長沙選館受業於柯後李教習庶常
以學士柏為題汪吉士俊有一日百回行樹底
之句李悵然有感衍為長歌云我行樹陰日千
匝雨葉風枝自蕭颯惟有諸生識我情旁人
解空嘲狎我見先生種樹年我身尚短樹及肩
枝蟠江山地可縮手幹造化天無權瓊臺翠閣
何森爽院柳庭花敢爭長芘蔭長留六月陰盤
迴直與孤雲上材堪五鳳難為用根列九泉終
不枉零落青袍幾故人瑀琮玉珮空遺響當時
院長文安公柯亭劉井相西東百年遺愛豈獨

此此樹欲比人中龍柏猶如此我何似已媿斑
白非兒童名收椽桷有先後壽比金石無終窮
下堂再拜想顏色仰面正拂長髯風於是倡和
成卷以貽學士之子使藏焉蓋學士汲引後進
孜孜如不及二百年來樹猶勿翦勿拜至今想
其文采風流僕嘗思文獻可徵而詞林掌故闕
焉不講在中禁日會粹玉堂舊事自唐宋迄
明撰瀛洲道古錄一編弟子長洲陸肯堂請事
開雕謂刊成凡入院者必給一本庶知以古人
自期斯文不幸陸生云亡至今藏之篋衍恐終
歸覆醬可歎惜也

游囊山寺

下馬松關外行過虎溪鍾鳴知寺近雲暝覺天低斷

澗流泉澀平岡古木齊何當一作時謝塵鞅此地卜幽棲

王 與 一首

與字廷貴武進人景泰辛未賜進士第三授翰林編修遷侍講歷春坊右庶子改南京翰林學士陞國子監祭酒擢南吏部右侍郎召為戶部左侍郎陞南吏部尚書卒贈太子太保謚文肅

有思軒橐

李時遠云宗伯為詩清雅間出悲壯之音

宿沛縣泗亭驛

維舟當泗水涼雨洗炎蒸砧杵孤城月漁舟別浦燈客
愁秋更甚鄉夢遠難憑千古龍飛地令人感廢興

楊守陳 三首

守陳字維新鄆縣人景泰辛未進士改庶吉士
除翰林編修歷侍講洗馬遷學士擢吏部右侍
郎兼詹事府丞卒贈禮部尚書謚文毅有晉菴
桂坊鏡川東觀金坡鉉部諸集

李賓之云文毅詩博采深詣典

則溫厚成一家言而愛君憂國
感事寓物得諸三百篇者深

詩話文懿難經伉伉不屑拾淳熙諸儒遺唾而
詩格深穩在唐宋之間其史館感懷詩云在古
左右史言動悉分書由漢至國初有官注起居
不知自何歲史職曠成虛有故始闕館編纂亦
紛如新人叙陳迹寧免闕且疎又云崔杼弑其
主直筆遭刑誅二弟相繼死南史猶特書古人
守一職往往思捐軀可憐今世士利害論錙銖
蓋公留心史學嘗草疏言國史有三大闕事未
舉一靖難後不記建文君朝政及方黃死事諸
臣一景帝已復位號實錄猶附書稱郕戾王一
章疏留中者不獲登實錄宜宣付史館惜乎疏
雖草而未及上也晚語徐少詹云平昔才無半
斗而勤作文飲僅數合而喜與客譚行
不能里許而好游蓋雅人之習尚然矣

游虎丘

出城纔數里已到白雲間但見門臨水那知寺有山
鍾鳴僧出定林動鶴飛還石磴行行遍花宮盡啓關

贈周廷參張邵齡二知己

客牕情思渺無涯麥隴蔬畦浥露華白屋三間連野寺
青苔一徑入鄰家晴煙亂繞庭中樹夜雨微沾戶外花
此地幽偏可乘興馬蹄來去豈嫌賒

春城遊宴詩

蝻蟬石首和椒橙新筍香甘帶肉烹非是老饕偏愛此

十年不歡故鄉羹

童軒一首

軒字士昂鄱陽人以天官學入欽天監家於南
京中景泰辛未進士以吏科給事中撫川寇謫
知壽昌縣久之以太常少卿掌欽天監以右副
都御史總制松江歷陞吏部尚書致仕有清風

亭橐枕肱集

周吉父云尚書九日詩云黃菊酒
香人病後白蘋風冷雁來初草堂

夜雨生科斗花遲春
風叫栗留均佳句也

憶金陵

金陵佳麗地風景想依然城闕金湯固江山罨畫連晚
風樓上笛春水渡頭船惆悵曾游地而今又幾年

王

越九首

越字世昌濬縣人景泰辛未進士天順中以御
史超拜右副都御史巡撫大同進太子太保兵
部尚書論出塞功封威寧伯佩征西前將軍印
尋加少保兼太子太傅卒贈太傅謚襄敏有雲

山老嬾集

李賓之云王公歌詩雄邁跌宕若不
屑意而奇偉不羣 崔子鍾云王公

詩明易通暢不事艱刻然氣象雄偉才思煥發
王鳳竹云王公摘辭揆藻品格直逼盛唐其

忠君愛國之心懇惻流溢良由賦才之奇渾然
天成不假匠鑿 李時遠云威寧才思之美倚

馬萬言往往皆出新意使加以深沉之思豈一
時操觚者所能及 李舒章云威寧才思敏捷

奈其太率不脫兜牟之氣 周青士云威寧詩
不雕不琢而符采奕然五言如一杯今夕酒十

載異鄉人客裏有歸夢眼前無故人石橋平似
掌茅屋小於船豆蔓穿籬過苔錢上樹生飛來

沙上鷺銜出水中魚夜吟山月小春夢海天遙
七言如四面好山朝日觀一溪流水落天門雲

間雞犬迎游客雨後兒童埽落花一路草香都
是藥滿林樹老盡生苔間身未老休扶杖短髮

無多不受簪風向眼中吹出淚霜於髯上凍成
冰愁人正似井中坐好客忽從天上來金縷且
聽新樂府鐵衣休話舊軍功亭前春雨一林竹
溪上秋風兩岸蘆路隔三千餘里遠月經二十
四迴圓百年人得幾時健一歲月無今夜明自
笑年來長送客不知身是未歸人鵲遺巢去鳩
先入蛛曳絲來蝶倒懸山下夕陽芳草路橋邊
流水落花村當時只學魯男子今日不如阿大
夫莫笑買牛新學稼也曾騎馬
舊巡邊不求工而未嘗不工也

詩話威寧功紀旂常盟申帶礪立功已足不朽
而於詩沾沾自喜長篇奔放如快馬不受羈繼
未免有銜蹶之虞雖意在取法盛唐然往往流
入擊壤一派其送周宗太詩云可憐相見未能
久無那匆匆又分手臨岐把袂且談詩何用尋
常一杯酒古詩起於列國前孔子刪為三百篇

發乎情性止禮義所以音律皆自然後來風雅
不復作獨有離騷味堪嚼秦漢已下雖頗淳已
食古人之糟粕盛唐取諸杜少陵西晉取諸陶
淵明少陵忠義所感激淵明渾然而天成五代
之詩無足齒宋人之詩理而已抑揚辭氣欠從
容遂失溫柔敦厚旨元人之詩學晚唐巧者自
巧狂者狂大音元氣日凋喪詩道至此幾云亡
又近體論詩云雕肝斲肺漫勞神語不求奇意
自新爾雅本無難識字離騷還
有獨醒人蓋自道其所得也

中秋對月用孟浩然韻

明月下空庭清光寒不濕褰簾坐來久忽見飛螢入空
懷寂無聊何處砧聲急對酒不成唸起向西風立

榆陵送武靖侯趙公還京

古人一日別常懷千里思
況在天之涯而與君相離風
寒歲云暮夜永雞鳴遲悠悠
行路難苦樂心自知人生
如浮雲聚散安可期君歸日
以遠我歸當何時豈不念
鄉國顧此王事縻霜月滿孤
城照見遊子悲

遊金龍池

雲深池水寒流出青山口
雲水復何心鷗鷺自相友時
維秋氣涼佳節近重九侵曉
解征鞍徘徊日將酉歷覽

古遺蹤因之問村叟叟云吾不知世遠人亡久文獻不足徵請看池上柳遙遙數百年今亦半枯朽人生能幾何少壯忽老醜往事無足論且盡杯中酒

見琴

野雉雒於鼎桑穀生於朝聖王務修德災患乃自消琴星見東方垂象何昭昭天心愛人君君心胡可驕反身當自責弭此天上妖轉禍以為祥一念之所招

金雀花

侯門愛金雀金雀顏色好化作枝上花凌春獨開早冶
遊亭館多芳容等閒老東風一飄零不及澗邊草

初度

今年四十八去年四十七明年四十九五十爭幾日逆
數六十來光陰彈指疾七十從古稀八十安可必所以
百歲人千萬不見一嗟哉宦海中悠悠良自恤

題蠲上人畫

好山萬仞高插空羣峰竝列青芙蓉大者突兀如盤龍

小者箕踞如蹲熊峰頭短樹亂如草凌霄獨立蒼蒼松
一重流水一重竹竹邊盡是山僧屋上方下界知幾重
銀杏紅椒滿空谷山中屋貯山中雲山中雲卧山中人
山中之人出山去畫裏看山秋復春

蜀中送項斯誠同年回京

白髮慈親七十餘不知消息近何如老來賴我供湯藥
別後憑誰奉板輿旅館夜長頻有夢故鄉路遠久無書
君歸正向門前過為報平安莫倚閭

鴈塔

慈恩古塔一間登瘞鶴銘亡問寺僧舊壁遍題唐進士
遠烟多見漢原陵感懷已寄無窮事縱目還須最上層
不省風鈴綠底語只今誰是佛圖澄

馬文升一首

文升字負圖鈞州人景泰辛未進士累官少師
兼太子太師吏部尚書贈太傅再贈左柱國太
師謚端肅有集

游桃源洞

桃花源接武陵溪咫尺仙家路易迷
指點秦人舊蹤跡
蕭蕭方竹斷橋西

姚旭
一首

旭字景暘桐城人景泰辛未進士授刑科給事中
天順間以言事謫判鄭州仕至雲南參政有
菊潭集

管叔城

管城廢址草茫茫屈指曾經百戰場但有鴟鵂鳴夜雨
不堪車馬送斜陽山含秋色迷孤館樹引荒雲覆女牆
試上層樓頻悵望鎬京離黍總堪傷

沈 珪 一首

珪字公貴平湖人景泰辛未進士山東道御史
有橋門漫橐柏臺新橐

詩話公貴少與兄公禮齊名公禮名琮中正統
壬戌進士仕至廣州守兄弟居父母喪廬墓下
六年不肉食先後哀毀卒詔旌其宅曰孝行之
門公禮詩有石窗漫橐予少日曾見之記有橐

極香生秋雨後桔槔聲斷夕陽前雨餘竹外僧
歸寺日出松顛鶴下巢山花帶雨落成片野鳥
見人飛作羣之句今其集不復
再觀矣錄公貴詩附識於此

題漁隱故居

名落人間二十年一溪漁隱自悠然
晚風楊柳堤邊笛
秋雨蘆花渡口船
沽酒肯邀漁父醉
枕蓑時伴野鷗眠
只今回首成陳迹
羸得人稱似輞川

李應禎 一首

應禎名姓以字行更字貞伯長洲人景泰癸酉

舉人授中書舍人仕至南京太僕寺少卿有李

氏遺集

李時遠云少卿詩朗秀
沖閒已造中唐佳境

詩話少卿入太學中官牛玉請為塾師固拒之
在中書日應制寫佛經進曰臣聞為天下國家
有九經不聞有佛經也不受命可謂婞直矣歸
田後與吳原博史明古張子靜輩賦詩聯句其
寄友詩云別墅園基常載酒晴
湖泛月不張帆風流可想也

東禪寺

松杉滿院風豆莢一籬綠不聞車馬喧時有高人宿

徐溥

一首

溥字時用宜興人景泰甲戌賜進士第二累官

少師兼太子太師吏部尚書華蓋殿大學士卒

贈太師謚文靖有謙齋文錄

朱懋忠云文靖詩清潤和平足以鳴

國家之盛

詩話文靖詩不求工然如鳥跡平沙晚花香小徑春但使客長醉何妨酒屢賒綽有風致

歸樂堂

十年游上國此日賦歸歎倦却風塵路來尋水竹居山
行春載酒門掩畫攤書薄暮投林鳥相看意自如

何喬新 四首

喬新字廷秀一云字天笛江西廣昌人冢宰文
淵子景泰甲戌進士授南禮部主事改刑部歷
員外郎中陞福建按察副使改河南擢都察院
右僉都御史巡撫山西召為刑部左侍郎進尚
書卒贈太子少傅謚文肅有椒丘集

秋懷

白露悴百草玄蟬寂無聲庭柯斂新翠日夕寒蛩鳴感

此時序易披衣坐前榮仰視天宇間銀河隔雙星一葦
亮可航相望未合并玄運亦多阻矧茲塵俗情援琴鼓
別鶴感我淚交零

登岳陽樓

雲牕月牖俯清流滿目山川快壯遊誰向江湖懷北闕
謾誇樓閣冠南州朱絃夜鼓湘靈瑟錦纜春迴楚客舟
欲起靈均歌九辨澧蘭沅芷徧芳洲

擬唐宮詞

花貌宮娃老掖庭承恩元不在傾城披香殿上開春讌
閒看羣姬弄化生

過故相第

門掩西風晝不開
蜚蜚滿壁粉牆頽
庭前乳犬休驚吠
無復懷金暮夜來

謝省一首

省字世修黃巖人景泰甲戌進士南京兵部員
外郎出知寶慶府

山行

杖屨躋攀到九華不知何處是仙家
高蹤一去無消息惟有碧桃春自花

李裕一首

裕字資德豐城人景泰甲戌進士授監察御史
陞山東按察使轉陝西左布政召入為順天府
尹尋陞右都御史未幾調南京轉工部尚書改
吏部有餘力橐東藩倡和詩

渡楊子江

曉經楊子渡畫舸一帆輕潮湧金山寺雲連鐵甕城江
豚吹浪白海日照林明坐聽鍾聲發悠然物外情

張寧

十一首

寧字靜之海鹽人景泰甲戌進士官禮科給事

中兩使朝鮮轉都給事中出知汀州府有方洲

集

徐子元云方洲高雅清俊得唐調王元美云張靖之如小權急流一瞬而過無復雅觀

蔣仲舒云靖之既離瑣閭旋就乞身追念舊思愴然興涕歌詩本於才敏終鮮沉思大槩一

時之雄終難百世之業顧玄言云方洲縱調
騁情頗稱作者句如林葉經霜盡河冰近午開
殷璠所稱意新
理愜斯得之矣

詩話黃門賦才捷敏不費沉思兩使朝鮮水館
星郵留題殆遍陪臣朴元亨以刑曹判司為館
伴詩篇酬和殊不相下及偕登太平館樓黃門
成七言長律六十韻元亨誦至溪流殘白春前
雪柳折新黃夜半風之句乃閣筆曰不能屬和
矣使族為大臣所忌出守汀州與岳文肅同日
拜命致仕歸而築方洲草堂於海濱疊石為山
上有峰曰蒼玉曰拄頰曰小飛來巖曰宿雨曰
滴露洞曰歸雲坡曰蘭雪岫曰茶烟嶠曰咏月
磬曰卓筆泉曰洗研池曰映山皆劖於石而通
目之曰一笑山家居三十年歌詩畫筆與雲東
逸史齊稱暮年無子有二婢子曰寒香晚翠剪

髮自誓不下樓者四十年有司以聞詔旌為雙
節釋明秀詩云交剪雲鬟報主恩鏡臺花落洗
頭盆同心誓死方洲上霜月寥寥夜照門一時
和者甚衆黃門嘗過杭州潑墨寫目送飛鴻手
揮五絃圖縱橫潦草侍婢笑之題詩云聞尋敗
筆作圖画小鬟立侍笑欲倒山頭頽似土灰堆
樹根亂若蓬蒿草所云
小鬟始即寒香晚翠乎

重游金粟寺有作

溪迴通小艇山峻露層臺林葉經霜盡河冰近午開
雲僧出定舊雨客重來擾擾浮生路經過定幾回

感事

羽書昨夜報居庸百萬雄師下九重天子垂衣臨大漠
羣臣端笏扈元戎禁中已乏回天諫閭外誰成闢地功
千古澶淵扶日轂令人長憶寇萊公

莫愁樂

金雀玉搔頭生來字莫愁自從歡去後不出石城游
南浦停雲

不見同心人相思渺雲樹記得別離時却在飛雲處
林良花鳥

竹樹晚淒淒天寒相傍棲春風疎雨歇飛上畫樓啼

園梅盛開

暖透孤根雪乍消冰花萬點綴寒條尋幽欲寄山中客
忘却西湖有斷橋

後浦漁歌

欸乃新聲度遠汀烟消日出樹冥冥年來悟得滄浪意
長近西堂竹下聽

題畫

查靄昏黃夜泊船
鷓鴣聲裏雨如烟
秋風不見平安信
夢斷湘江又十年

竹鶴老人畫

水烟山靄樹冥冥
船在丹青畫裏行
好是苕溪二三月
南邊雨落北邊晴

蘋花館

宿水停烟綠近牆
繞門葭菼共蒼蒼
寒香欲薦無人采
月落空庭夜有霜

寄余驛丞

南薰亭館晚相延
屈指星霜又十年
不是重來渾忘却
黃昏舟過驛門前

彭華一首

華字彥實安福人
景泰甲戌進士
改庶吉士累
官禮部尚書
入直內閣
以宮保尚書致仕卒謚
文思有集

明妃曲

抱得琵琶不忍彈
風沙獵獵雪漫漫
曉來馬上寒如許
信是將軍出塞難

丘

濬

五首

濬字仲深瓊山人景泰甲戌進士選庶吉士授翰林編修歷侍講學士陞禮部侍郎進尚書加太子太保入直文淵閣尋加少保戶部尚書武

英殿大學士卒贈太傅謚文莊有瓊臺會稟

李賓

之云公之學於詩固有所不屑專而實專門者所不逮程克勤云公詩如仙翁劍客隨口所

出皆足驚人雖雅俗正變體裁不一而格律精嚴不失矩度黃才伯云先生信口為詩語皆

警拔

詩話文莊於詩不事鍛鍊而矩度自合其與友人論詩絕句云吐語操持不用奇風行水上幽抽絲眼前景物口頭語便是詩家絕妙辭其言未嘗不是第恐學者因之流於率易墮入定山一派不可也

擬古

依依重依依不忍生別離別離已可悲況值秋風時柳衰不堪折情苦不堪說願妾為小星君身化明月明月

貼天飛小星恒相隨月出星隨出月歸星亦歸莫學秋
胡妻相逢不相識生者固可慚死者亦何益

送廣東夏廉憲

當宁念遠氓塗炭日以極詔簡在廷臣往司風紀職僉
曰御史某秉德剛且直屬耳按左右風聲甚煇赫兵政
既以舉吏弊亦以革謠言聞遠近公論推第一無如斯
人可拜手答明勅天子曰俞哉起授三品秩天語重丁
寧綸命光舄奕百僚無間言相見咸喭喭而我嶺南人

慶幸倍千百預為鄉人喜從此得蘇息特恩許乘傳陞
辭行有日走也官禁近早有半面識中心久有懷臨分
忍緘默聊為陳本末幸與垂采擇惟茲東廣地富麗自
古昔秦初已內附漢後亦廣斥東西數千里十郡六十
邑衛所錯其間小大五十七憶昔全盛時承平久寧謐
家家有蓋藏人人各安適土著少流徙世業足資給士
族尚詩禮農家務耕織先期輸賦稅俛首供力役民不
受箠楚兵不識鋒鏑行旅不齎糧遠出不待告晷夜絕

剽竊歉歲無行乞況復天氣暄地利多所獲三冬著芋
衣五月收新植山畝少汙菜水田自潮汐舟游泛滄茫
火種燒方崩曉包趁墟飯晴著登山屐海錯富蚌蜆家
烹剩豚鮓文本生山林珍貨來蕃舶荔奴然火樹橘柚
垂金實間右食素封田圃盛嘉植愛身寧破產終訟羞
曲筆遐邇總安恬公私舉豐殖逮及廿年來長吏恣胸
臆厚利動其中甘言誘其側欺彼民柔愚藐茲地遐僻
遂決禮義防大肆搏噬力把臂褫其衣挾口奪之食溪

壑填不滿氣燄撲難熄上下相師承前後遞沿襲豈云
無鷹鸇方自為蝨螭天門遠萬里無地訴冤抑致令仁
厚性化作兇險質弄兵潢池中延息苟旦夕外邪尋即
除中虛遂成疾蠹茲洞中猺窺伺乘間隙始惟掠近地
稍稍出復匿迹彼素脆悞頓異戎與貊制伏本非艱而
我狃安逸武胄恥言兵文吏諱申賊縱虎出林薄延鬼
入居宅路有橫草虞闕無一夫搯長驅捲村落乘夜盜
城壁豈彼智有餘乃我法不立歲歲轉猖披邊境遭輶

輶脅從日漸多兇徒日增益居民就流散人烟渺蕭瑟
已身不自卹何暇問家室田蕪乏犢耕井渫無人汲萬
家春草青一望秋原赤禾麻種殆絕雞犬聲亦寂昏雨
燐火青涼月死骨白內地幸苟免因之困供億相扇咸
弗靖濡沫聊戢戢方今堯舜朝大臣總臯稷萬國俱時
雍一方獨艱阨九重赫然怒遣將擣其窟天道信好還
王師本無敵鼎魚姑假喘穴蟻難藏迹行當見埽平星
穢永蕩滌却愁火然罔罔辨玉與石嗟爾嶺徼人罹此

殊可惜賈父來每晚謝令去不亟由來非一朝往者何
嗟及幸茲天日開光景方昭熠草木回生意山川增秀
色福星離紫垣甘雨隨丹軼指日下滇江持節鎮南國
先聲一以聞父老懽以泣迎拜古道旁應以手加額願
言明使君代天布仁德為我招殘魂為我肉枯骼為我
作保障為我剪荆棘為我開喉吻為我插羽翼醫我眼
前瘡除我腹中匪我寒衣以裘我饑食以粒生者受我
屢死者與我裨一夫或失所孰非使君責使君今已行

行行去須急齊民正倒懸異類尚反仄如病望醫師如
早望雨澤寄聲報吾人此公古難得瘴海行將清貪泉
不能惑佇看凋弊區復作全盛域

鍾廣漢云長
篇銳氣不衰

村行

萬里勞行役驅車趁晚晴鴉邊殘照遠雨外斷虹明山
徑高低路村春遠近聲隔林人語寂一犬吠相迎

中秋有感

客裏逢秋景思鄉倍愴神依然今夜月不見去年人

秋思

水落淺灘石出霜冷疎林葉丹天外數聲過鴈人在高樓倚闌

伍方一首

方字公矩嘉興人景泰甲戌進士知武岡州謫戍柳州有柳菴集

詩話公詎與張靖之丘仲深同年成進士三人莫逆時有倡酬靜之詩云丘仲深伍公矩元是長安看花侶又云江東雲渭北樹仲深不來公矩去望斷斜陽舊游處仲深亦有送公矩之柳

州詩云平生故人伍公矩少年學文今學武興
來拔劍為我舞顧儂豈是噲等伍末云吳山高
今粵水長南歸若見張給事引杯燒燭歌我送
行章可謂篤同譜之義矣柳菴集予少日於金
明僧舍見之凡四冊曾覽一過今購之不復可
得僅從稿李英華集錄其一絕雖不見好存其
人也

畫竹

花點湘雲墮碧川翠梢零落帶秋煙歸篷記得曾看處
殘月黃陵古廟前

杜庠一首

庠字公序長洲人景泰甲戌進士除知攸縣罷
歸有楚游稟江浙歌風集

詩話公序從張節之游同學者藐之節之贈詩
云炳蔚虎豹文卓犖珊瑚枝學子因改視焉嘗
過赤壁題詩張汝弼奇之一時呼為杜赤壁仕
既不達汗漫湖海間自稱西湖醉老葦牆椒壁
過輒留題然不經
意其可存者寡也

寄吳中諸友

故園東望路綿綿一別何期竟隔年客思半消春酒後
鄉心都在夜燈前杏花村店西山雨楊柳河橋上苑煙

欲語平安歸未得自嗟身為薄名牽

彭澤一首

澤攸縣人景泰丙子舉人

春日雜興

春陰庭館晝生寒落葉游絲濕作團年少風流今減盡
牡丹開遍不凭闌

桑瑾一首

瑾字廷贊常熟人景泰丙子舉人處州府通判

橫瀝口泊舟

浦外炊烟起柁牙岸頭茅屋是農家
一冬苦雨全無麥二月春晴未見花
野渡至今濡馬足江潮久不露鷗沙
閒隨漁父談占候怕見朝霞愛暮霞

黃瑜 二首

瑜字廷美香山景泰丙子舉人長樂知縣有

雙槐詩集

井嶼

宋端宗御
舟至此

白雁過江南破更無一尺土可坐自聞入廣隨波流塵
沙暗天天亦愁黃蘆苦竹風颼颼鷓鴣雨中啼不休上
有深井山下有仙女嶼黑雲卷波白浩浩漁舟不到御
舟到鱷魚鬚揚蛟尾掉蒼天蒼天誰與告

詩話是詩依南海歐秦孚所藏
錄本與廣東通志所載不同

城西劉王故院

江水東流西日斜劉郎綦跡尚天涯昌華苑外裙腰草
玉液池邊鼓吹蛙隔隴牛羊聞牧笛遙林烟火見漁家

當年翠輦宸遊地留與東風長稻花

陳 贄 二首

贄字惟成餘姚人以薦官儒學訓導入為翰林

待詔陞廣東參議遷太常少卿有蒙菴集

黃太冲云

惟成從鄉先生宋公傳張臺民得其詩法評者謂古詩逼陶柳近體駸駸乎盛唐

晚發五溪

巴川移短櫂正值暮秋天客路猿聲裏鄉山雁影邊
葭連晚渚穉稻滿秋田風物雖堪戀其如歸思牽

蠻中

蠻溪雨過葉皆流
落日猩猩啼樹頭
高竹亂藤茅屋小
不知村落屬何州

劉英 二首

英字邦彥錢塘人景泰中郡邑交辟以母老辭
有賓山集蕉雪橐竹東小橐湖山詠錄

程克勤云邦彥

孝友似黃山谷高蹈似魏清逸曠達似楊鐵崖其詩精妥流壘兼備衆體

寶峰樓看沈啓南畫因懷畫中詩人存沒

尋僧重上寶峰樓
撫景興懷不自由
東海傷心諸老散
西湖回首十年游
摩挲舊畫題新句
慙愧青山對白頭
空負梨花一尊酒
無人共載木蘭舟

載酒過湖

寒食清明次第來
紫袍紅萼裏池臺
東風似與人商略
最好花枝最後開

聶大年

五首

大年字壽卿
臨川人
用薦為仁和訓導
陞教諭

景泰初徵入翰林卒有冷齋集

俞汝成云壽卿詩尚襲元調

詩話聶大年掌教武林揭對聯示諸生云文章高似翰林院法度嚴於按察司以是見忤達官九年不調泰和王行儉掌銓衡以詩寄戴文進索画自叙十年始成大年題其後云公愛文進之画十年而不忘也使公以十年不忘之心待天下之賢天下豈復有遺才哉語稍聞於王而王不介意也天順初被徵入史局病中以詩別行儉曰鏡中白髮難饒我湖上青山欲待誰千里故人分索少百年公論蓋棺遲行儉得詩泣下曰大年欲吾銘其墓耳明日而大年卒行儉為作墓志曰吾以大年之才必能自振故久不擬薦而乃止一校官邪大年諸體平熟惟絕句小詩差有韻致比於劉泰士亨陸昂元偶馬洪浩瀾王澄天碧諸子似勝之

題畫瓜

翠實離離引蔓秋
西風涼露滿林丘
東門尚有閒田地
千載無人說故侯

題彥顥畫中小景

水禽沙鳥自相呼
遠近雲山半有無
一葉扁舟兩三客
載將烟雨過西湖

題許上舍家梅花

西湖曾繫木蘭橈
湖上殘雲雪未消
報道南枝春信早

移船更近段家橋

夏日次侃禪師韻

高亭暑夜景相和涼月絺衣挂薜蘿楊柳風輕湖面闊
不知何處藕花多

題仲昭竹

舍人老作鄖陽守尚愛揮毫寫竹枝絕似樣舟湘水上
鷓鴣啼斷雨來時

陳延齡

二首

延齡初名壽字昌年嘉興人景泰中郡掾吏有

玉崖子集

題畫二首

洞庭微雨曉生波一櫂雲山客裏過綠遍蘼蕪歸未得

東風閒唱竹枝歌

楊花如雪正殘春新水茫茫浸綠蘋桃葉桃根何處是

東風愁殺渡江人

劉溥七首

溥字原博長洲人宣德初授惠民局副使後調

太醫院吏目有草憲集

王元美云景泰中稱詩稟者十才子而劉溥湯

胤勛為之首

蔣中舒云溥詩如淮陰少年武健自足時欲侮人使少加揖遜亦一時名流

詩話劉原博湯公讓盛有詩名原博於除夕為劉主事廷美作終南進士行廷美懸之堂上次日賀正客至爭裂門籍紙傳寫廷美笑曰此乃耗紙鬼也嘗語客云不讀二萬卷詩看溥詩不得而公讓守官詩出一時驚歎以為有神今觀之殊堪作惡時無英雄遂有十才子之目然就諸子而論原博特多忠悱之言於彼法中差勝劉宗器贈詩云心事一於詩激發何慨慷靜中聊自怡鬱抑賴舒暢短章既從容長篇亦跌宕府藏出珍奇鈞天奏空曠正如巨陂中魚龍交

蕩漾有時為我歌三歎而
一唱未免矜譽過其實矣

古意

美女出齊州容華世無雙
修眉結輕綵麗目曼騰光
鮮紉被玉體明月綴兩璫
巧笑發春華氣若秋蘭芳
窈窕高樓居宛在大道傍
媒氏致千金琴瑟諧高張
既製合歡被復製合歡牀
德義苟無虧恩愛永不忘

雜詩

仲秋涼氣肅白露下庭柯
芳蘭委輕颺桂樹行復華
俛

仰時節至生意迭以嘉理運本自然無為徒咨嗟人生
貴有道富貴安足誇膏火一朝盡撫膺其奈何

晚過揚州

長安懸落照短櫂尚孤征衰柳愁邊斷殘霞雨外明人
喧揚子渡鐘動廣陵城漸去鄉關遠淒然倍旅情

使回過獨石

邊城二月暗塵沙吹遍東風不見花天遠玉京旋日騎
水通銀漢繫星槎雲中路出高山險上谷雲連獨石斜

正是旅愁消未得夕陽樓外又鳴笳

江上別

相逢蘭渚潮長相送烟江日斜只說儂家易識門前一
樹梨花

題畫寄徐州陸九臯

二首

別後重來未有期且憑圖畫寄相思秋風黃葉茅亭上
猶記逢君是此時

目極天涯酒半醒楓林斜帶遠山青故人家在秋雲外

百步洪邊水繞亭

湯肩勣 二首

肩勣字公讓東甌襄武王曾孫授錦衣百戶轉
千戶景泰中命通問上皇歸進指揮僉事成化

初以叅將守延綏戰沒有東谷集

王元美云湯公讓劉原博

如淮陰少年斗健作噉人狀

詩話徐元玉言於裕陵曰湯肩勣酒風漢耳鄒克明嘲以詩云湯家公子善夸詡好似蚍蜉撼大樹文章光燄萬古長却說杜陵無好句當時公論蓋未盡輸心也程克勤為作傳稱其詩豪

遇奇崛名家退避豈其然乎然使不
辱命死於疆場則誠豪傑之士矣

游仙

月照參差海上峰
颼輪度處滅行蹤
玄冥宮裏通宵宴

傳得新方解泰

一作擾龍

巨俠

獵火茫茫照四山
青衣小隊射生還
貂裘幾點輕盈雪

月照城門未上鐶

蘇平

四首

平字秉衡海寧人舉賢良方正不就有雪溪漁

唱

陳廷器云二蘇音趣高遠聲律和暢昭乎治世之音 李時遠云平詩溫柔敦厚自是可

人

詩話鄭谷鷗鵠崔珣鴛鴦謝逸蝴蝶表白燕
皆以一詩日之終身至蘇秉衡以繡鞵得名風
斯下矣即其南陌踏青春有跡西廂立月夜無
聲二語乃本於瞿宗吉少時香奩之作所云燕
尾點波微有韻鳳頭踏月悄無聲也以唇刺而
得虛譽忸怩已甚而秉衡妄為大言謂宋一代
今體詩僅王禹玉元夕一律彷彿唐人高青丘
詩二千首近體止吳女誦經一首可取獨當日
鄒御史克明作三夸詩以秉衡為首其次楊公
讓其次劉原博克明名在十子之列在同調亦

不免嘲笑之
他可知矣

雜詩

彼美南國姝婉孌貞且良丹霞製為珮明月懸為璫白
玉蓄光采幽蘭含芬芳見者咸歎息不殊古姬姜世無
蹇脩氏玉帛誰為將默默處重闈何曾下中堂容顏豈
不好攬鏡徒悲傷但恐芙蓉花零落隨秋霜

寄金粟王公子

中夜百憂集攬衣起傍徨明月揚素輝列宿互低昂耿

耿河漢流肅肅鴻雁翔念我同心人渺渺天一方昔為
雙游魚今為孤飛凰援琴不成曲展轉憂思長豈無蕙
蘭花為君掇其芳道遠莫致之中懷徒自傷

塞上曲

戰馬聞笳鼓橫行出塞門隴雲凝陣黑殺氣入邊昏決
策平沙漠捐生報國恩猶慙漢公主萬里嫁烏孫

班婕妤

一自辭同輦深宮草又生甘隨紈扇棄猶記玉階行明

月愁中影流鶯夢裏聲笙歌前殿夜教妾若為情

蘇正

一首

正字秉貞平弟有雲壑集

江南旅情

天涯為客久生計日蕭條旅思

一作沉

頻看月鄉心獨聽

潮春歸江上早家在夢中逢無限相思意東風白下橋

蘇直

一首

直字秉忠平弟有蘭畹集

詩話兼衡兄弟三
荆同株無分高下

送人東歸

東風官路柳依依
目送鄉園賦式微
晚渡雨晴孤櫂發
春江潮落遠人歸
夢回野戍遙聞角
家近滄洲獨掩扉
惆悵天涯同是客
臨歧那忍又相違

蔣主孝

一首

主孝字務本儀真人徙句容有樵林摘橐

無題

鳳輦春游繡嶺宮閒庭小雨落殘紅貞元朝士知誰在
一曲琵琶月正中

蔣主忠

一首

主忠字存恕主孝弟有集

芙蓉

清露下林塘波光淨如洗中有弄珠人盈盈隔秋水

沈愚

十一首

愚字通理崑山人自號崆峒生有笈籟吳歎二

集

詩話景泰十子才多下中通理特為翹楚同輩
極其引重劉原博題其集云清如玉樹含秋霜
麗如五色雲錦張琅然天外度靈響一曲一奏
春風香蘇秉衡贈詩云玉山才子東吳英丰姿
皎皎冰壺清骨中磊塊含元精騷壇少年推獨
步天仙鬼仙何足數又云多君祇今英妙年已
有新詩滿人口俊逸還凌鮑謝前清新肯落盧
王後王善甫贈詩云玉山沈郎更瀟灑芙蓉秋
水涵冰姿摩挲石壁寫新句毫端墨汁光淋漓
虔州黃進士閨詩云多情才子惜春華樂府新
聲對客誇朱雀橋邊舊游路東風開遍小桃花
誦之可想見其人矣余初見吳欽集錄其三詩
近東田學士示以先世手抄質籟集私印尚存
增益八首詩諸體皆清穩而絕句尤矯矯軼羣

在劉白之間題畫二首云汀蒲短短柳珍珍三月桃花水滿潭攜酒抱琴同一醉人生只合住江南山邊臺榭水邊樓秋月春花足勝游平底畫船如屋裏人生只合住蘇州通理兄弟四人愚魯質訥魯字誠學以學官弟子入場屋望見諸生蓬頭赤腳歎曰待士如此士可知矣遂走出不復與試以文筆自娛嘗作劉過傳西楊見而擊節曰如此人當以翰苑處之或勸其入都往謁不屑也訥字文敏中正統壬戌進士仕至福州按察副使卒于官仲季皆能詩所著集不傳學士誠學之雲孫也與予同年入翰林述其家世本末如是

閻門柳枝詞

二首

小蠻能唱白家詞
笑把纖腰關柳枝
愁絕樽前春未老

風流太守髻成絲

枝枝揉翠綰香車占斷春風日未斜
記得臯橋舊游處綠烟深鎖泰孃家

舊游即事

冶城東畔舊亭臺寂寂朱扉映竹開
一樹碧桃都落盡去年蝴蝶却飛來

寄淮南

江南相望路迢迢風滿關河雁影飄
最好鳳凰臺上月

共誰攜酒聽吹簫

過桃葉渡

江花含笑欲爭春
江水籠烟柳色新
商女停舟唱桃葉
東風愁殺渡江人

石頭城

谷口青鞵踏軟沙
橋頭艇子載琵琶
春風何處尋芳好
盧女門前幾樹花

金陵九日

京華風物近佳辰
黃菊秋香漉酒巾
欲上鳳臺同一醉
客邊誰是故鄉人

閬門夜泊

絲絲楊柳拂官河
烟際樓臺隔岸多
此夜闔閭城下泊
滿船明月聽吳歌

旅次送晏振之

西風孤櫂楚江濱
烟水殘陽照白蘋
底事送君情轉切
只緣身是未歸人

旅次石城

水落寒江露淺沙
斷隄烟柳集昏鴉
樽前冷笑陶彭澤
三迳秋香負菊花

陳宮懷古

景陽宮井積浮埃
三閣遺基半綠苔
惆悵後庭花落盡
黑頭江令獨歸來

鄒亮一首

亮字克明長洲人
用薦授吏部司務
遷南京監

察御史有鳴珂漱芳二集

詩話克明受知於周文襄用況守伯律薦授官
嘗撰詩宗韻海未就而卒自稱梅崖亦曰藻菴
居士病中自撰志銘謂脩短有數遺墓在長洲
縣金鵝鄉志中不及劉湯諸子姓名非其所矜
也式

長信宮

妙舞方承寵愁懷獨感傷金輿門外度紈扇篋中藏別
殿生秋月空階落晚霜涼飈如有意渾不到昭陽

王淮 二首

淮字柏原慈溪人有大塊橐

詩話伯原淹博號
行秘書詩殊淺率

寄吳廷圭

雁叫新霜九月時客邊節物倍淒其風吹敗葉藤纏屋
雨濕疎花豆壓籬八跪蟹肥村店酒一行鷺促野橋詩
待君流水柴門下共醉殘陽倒接籬

秋夜書懷

破窗燈火黯淒淒一榻空齋抱影棲愁斷關河千里雁

夢回風雨五更雞田荒故國蒼苔遍路接長亭碧草迷
歎息此身緣底事十年蹤跡苦東西


王貞慶一首

貞慶字維善一字善甫定遠人駙馬都尉永春
侯寧之子有茗芋集

詩話善甫懷慶公主所出生於侯門而能脫去
紉綺之習築別業於聚寶山中闢一軒繞以桂
樹因自號金粟主人能書善飲酒名
其詩曰茗芋集羊城陳廷器序之

送沈崧山歸玉峰

客從東吳來暫向金華住看遍京華春更憶東吳去秦
淮橋頭烟柳青執手臨岐別恨生扁舟後夜知何處月
色江聲無限情



明詩綜卷二十五